

Հավելված  
ՀՀ կառավարության 2019 թվականի  
հունվարի 10-ի N7 - Ն որոշման

Կ Ա Ր Գ

ՏԱՄՆՈՒԹ ՏԱՐԻՆ ԼՐԱՑԱԾ ՈՐԴԵԳՐՎԱԾ ԱՆՁԻՆ ԻՐ ՈՐԴԵԳՐՄԱՆ ՓԱՍՏԻ,  
ԾՆՆԴԱՎԱՅՐԻ ԵՎ ԺԱՄԱՆԱԿԻ, ԻՆՉՊԵՍ ՆԱԵՎ ԻՐ ԿԵՆՍԱԲԱՆԱԿԱՆ  
ԾՆՈՂՆԵՐԻ ԱՆՁՆԱԿԱՆ ՏՎՅԱԼՆԵՐԻ ՎԵՐԱԲԵՐՅԱԼ ՏԵՂԵԿՈՒԹՅՈՒՆՆԵՐԻ  
ՏՐԱՄԱԴՐՄԱՆ

I. ԸՆԴՀԱՆՈՒՐ ԴՐՈՒՅԹՆԵՐ

1. Սույն կարգով կարգավորվում են սոցիալական ապահովության ոլորտում կառավարության քաղաքականությունը մշակող մարմնի, Կոնվենցիայով ստանձնած պարտավորությունների կատարման նպատակով Հայաստանի Հանրապետության կառավարության որոշմամբ լիազորված՝ արդարադատության ոլորտում կառավարության քաղաքականությունը մշակող մարմնի, Հայաստանի Հանրապետության բնակչության սոցիալական պաշտպանության հաստատությունների կողմից տասնութ տարին լրացած որդեգրված անձանց իրենց որդեգրման փաստի, ծննդավայրի և ժամանակի, ինչպես նաև իրենց կենսաբանական ծնողների անձնական տվյալների վերաբերյալ տեղեկությունների տրամադրման կարգի հետ կապված հարաբերությունները:

2. Սույն կարգում օգտագործվում են հետևյալ հիմնական հասկացությունները՝

1) **Լիազորված պետական մարմին**՝ սոցիալական ապահովության ոլորտում կառավարության քաղաքականությունը մշակող մարմին.

2) **Կոնվենցիա**՝ «Երեկաների պաշտպանության և օտարերկրյա որդեգրման բնագավառում համագործակցության մասին» Հաագայի 1993 թվականի մայիսի 29-ի կոնվենցիա.

3) **Կենտրոնական մարմին**՝ Կոնվենցիայով ստանձնած պարտավորությունների կատարման նպատակով Հայաստանի Հանրապետության կառավարության որոշմամբ

լիազորված՝ արդարադատության ոլորտում կառավարության քաղաքականությունը մշակող մարմին.

4) **Ձև 1 տեղեկանք՝** սույն կարգով հաստատված ձև 1՝ 18 տարին լրացած որդեգրված անձի՝ իր որդեգրման փաստի մասին տեղեկանք.

5) **Ձև 2 տեղեկանք՝** սույն կարգով հաստատված ձև 2՝ 18 տարին լրացած որդեգրված անձի՝ իր որդեգրման փաստի, իր կենսաբանական ծնողների անձնական տվյալների վերաբերյալ անձնավորված կամ ապանձնավորված եղանակով տրամադրվող տեղեկանք.

6) **Տեղեկանքներ՝** սույն կետի 4-րդ և 5-րդ ենթակետերում նշված տեղեկանքներ.

7) **Տեղեկանք (տեղեկանքներ) տրամադրող մարմին՝** Լիազորված պետական մարմին, Կենտրոնական մարմին, Հայաստանի Հանրապետության բնակչության սոցիալական պաշտպանության հաստատություն.

8) **Օտարերկրյա պետության կենտրոնական մարմին՝** Կոնվենցիային անդամակցող երկրի կենտրոնական մարմին կամ տվյալ երկրում որդեգրման գործընթաց իրականացնելու իրավասություն ունեցող հավատարմագրված կազմակերպություն:

II. ՏԵՂԵԿԱՆՔՆԵՐԻ ՏՐԱՄԱԴՐՄԱՆ ԵՎ ԼՐԱՑՄԱՆ ՁԵՎԸ,  
ՀԱՅՑՈՂՆԵՐԸ ԵՎ ՏՐԱՄԱԴՐՈՂ ՄԱՐՄԻՆՆԵՐԸ

3. Տեղեկանքները տրամադրվում են 18 տարին լրացած որդեգրված անձին՝ իր որդեգրման փաստի, ծննդավայրի և ժամանակի, ինչպես նաև իր կենսաբանական ծնողների անձնական տվյալների վերաբերյալ:

4. Սույն կարգի 3-րդ կետում նշված՝ Տեղեկանքներ ստանալու իրավունք ունեցող անձը Տեղեկանքներ ստանալը կարող է հանձնարարել այլ անձի՝ նոտարական կարգով հաստատված և Հայաստանի Հանրապետության միջազգային պայմանագրերով նախատեսված կարգով վավերացված լիազորագրի առկայության դեպքում:

5. Սույն կարգի 3-րդ և 4-րդ կետերում նշված անձանց տրամադրվում են Ձև 1 և Ձև 2 տեղեկանքները՝ ըստ վերջինների ցանկության:

6. Ձև 2 տեղեկանքը լրացվում է անձնավորված կամ ապանձնավորված եղանակով:

7. Ձև 2 տեղեկանքը համարվում է անձնավորված եղանակով լրացված, եթե լրացված են որդեգրված անձի կենսաբանական ծնողների անունը, հայրանունը, ազգանունը, ծննդյան ժամանակը, ծննդյան վայրը, աշխատանքի, հաշվառման, փաստացի բնակության վայրերը կամ վերջիններիս մասին այլ տվյալներ, որոնց լրացման արդյունքում հնարավոր է իրականացնել ծնողի նույնականացում: Սույն կետում նշված տեղեկությունները լրացված չլինելու դեպքում Ձև 2 տեղեկանքը համարվում է լրացված ապանձնավորված եղանակով: Ապանձնավորված եղանակով լրացված տեղեկանքը չի կարող պարունակել որևէ տեղեկություն, որի միջոցով հնարավոր կլինի նույնականացնել կենսաբանական ծնողներին:

8. Տեղեկանքները տրամադրվում են Լիազորված պետական մարմնի, Կենտրոնական մարմնի, Հայաստանի Հանրապետության բնակչության սոցիալական պաշտպանության հաստատությունների կողմից:

9. Լիազորված պետական մարմնի կողմից Տեղեկանքները տրամադրվում են այն որդեգրված անձին (վերջինիս որդեգրման փաստի և կենսաբանական ծնողների վերաբերյալ), որը որպես որդեգրման ենթակա երեխա հաշվառվել, և որի որդեգրումն իրականացվել է Հայաստանի Հանրապետությունում:

10. Կենտրոնական մարմնի կողմից Տեղեկանքները տրամադրվում են այն որդեգրված անձին (վերջինիս որդեգրման փաստի և կենսաբանական ծնողների վերաբերյալ), որը որպես որդեգրման ենթակա երեխա հաշվառվել է Հայաստանի Հանրապետությունում, և որի որդեգրման գործընթացը կազմակերպվել է Կոնվենցիայի շրջանակներում:

11. Հայաստանի Հանրապետության բնակչության սոցիալական պաշտպանության հաստատության կողմից Տեղեկանքները տրամադրվում են այն որդեգրված անձին (վերջինիս որդեգրման փաստի և կենսաբանական ծնողների վերաբերյալ), որի անձնական գործը պահպանվում է տվյալ հաստատությունում:

### III. ՏԵՂԵԿԱՆՔՆԵՐԻ ԲՈՎԱՆԴԱԿՈՒԹՅՈՒՆԸ, ՏՐԱՄԱԴՐՄԱՆ ԺԱՄԿԵՏԸ, ՎՃԱՐԸ

12. Տեղեկանքները տրամադրվում են հայերեն լեզվով:

13. Տեղեկանքները տրամադրվում են անվճար:

14. Տեղեկանքները հաստատվում են դրանք կազմող մարմնի կամ պատասխանատու ստորաբաժանման ղեկավարի ստորագրությամբ և կնքվում համապատասխան մարմնի (կամ պատասխանատու ստորաբաժանման) կնիքով:

15. Տեղեկանքները տրամադրվում են դիմում ներկայացնելուց հետո երեք աշխատանքային օրվա ընթացքում: Այն դեպքում, երբ հայցողի կողմից տրամադրված տեղեկությունները բավարար չեն որդեգրված անձի անձնական գործը հայտնաբերելու կամ որդեգրման փաստը պարզելու համար, Տեղեկանքներ տրամադրող մարմինը անհրաժեշտ լրացուցիչ տեղեկությունները կարող է ստանալ հայցողից՝ նրա հետ կապ (հեռախոս, էլեկտրոնային փոստ) հաստատելու միջոցով: Էլեկտրոնային փոստի միջոցով կատարված հարցման պատասխանը երեք աշխատանքային օրվա ընթացքում չստանալու դեպքում Տեղեկանքներ տրամադրող մարմինը ղեկավարվում է իրեն տրամադրված և իր տնօրինման ներքո գտնվող տեղեկություններով:

16. Տեղեկանքներ տրամադրելու համար լրացուցիչ տեղեկություններ ստանալու անհրաժեշտության դեպքում Տեղեկանքներ տրամադրող մարմինը կարող է դիմել սույն կարգով նախատեսված այլ իրավասու մարմիններին: Հարցում կատարելու և պատասխան ստանալու ժամանակահատվածը չի հաշվարկվում սույն կարգի 15-րդ կետում

նշված ժամկետում: Տվյալ դեպքում Տեղեկանքները տրամադրվում են այլ իրավասու մարմնից անհրաժեշտ տեղեկությունները ստանալու հաջորդ օրը:

17. Որդեգրված անձի՝ իր որդեգրման փաստի (ծննդավայրի և ժամանակի), կենսաբանական ծնողների մասին տեղեկություններ չհայտնաբերելու կամ տեղեկությունների բացակայության (ընկեցիկ երեխա, ծնողներն անհայտ են և այլն) դեպքում տեղեկանք հայցողին սույն կարգի 15-րդ, 16-րդ կետերով սահմանված ժամկետում տրվում է գրավոր պատասխան՝ հայցվող տեղեկությունների տրամադրման անհնարինության մասին՝ նշելով պատճառները:

18. Տեղեկանքներում լրացվում են այն տեղեկությունները, որոնք հայցվել են դիմողի կողմից: Դիմողը կարող է հայցել Տեղեկանքները լրացնել մասնակի՝ նշելով իրեն անհրաժեշտ տեղեկությունները:

19. Տեղեկանքները լրացնելու համար հիմք են հանդիսանում որդեգրված անձի անձնական գործում առկա փաստաթղթերի տվյալները:

20. Տեղեկանքները լրացվում են Տեղեկանքներ տրամադրող մարմնի կողմից հայտնաբերված տեղեկություններին համապատասխան: Լրացվում են Տեղեկանքների միայն այն սյունակները, որոնք լրացնելու համար տեղեկությունները տնօրինում կամ պարզել է Տեղեկանքներ տրամադրող մարմինը՝ հաշվի առնելով սույն կարգի պահանջները: Բացակայող տեղեկությունների համապատասխան սյունակները չեն լրացվում, որոնց լրացված չլինելու պատճառը նշվում է «Տեղեկանքը տրամադրող մարմնի նշումներ» տողում:

21. Ձև 2 տեղեկանքում որդեգրված անձի կենսաբանական ծնողի՝ սույն կարգի 7-րդ կետում նշված անձնական տվյալները լրացվում են անձնավորված եղանակով, եթե որդեգրվածի անձնական գործում առկա է այդ ծնողի համաձայնությունը (հայտարարու-

թյուն, դիմում և այլն)՝ իր անձնական տվյալները որդեգրվածին տրամադրելու մասին՝ հաշվի առնելով սույն կարգի 23-րդ կետի պահանջները:

22. Ձև 2 տեղեկանքում որդեգրված անձի կենսաբանական ծնողի անձնական տվյալները լրացվում են ապանձնավորված եղանակով, երբ որդեգրված անձի ծնողը հրաժարվել է սույն կարգի 7-րդ կետում նշված իր անձնական տվյալները տրամադրել որդեգրված անձին, կամ որդեգրված անձի անձնական գործում բացակայում է ծնողի համաձայնությունը՝ անձնական տվյալները երեխային տրամադրելու մասին:

23. Ձև 2 տեղեկանքը անձնավորված եղանակով լրացնելու դեպքում լրացվում են միայն այն սյունակները, որոնց մասին տեղեկություններ հայտնելու համաձայնությունը տրվել է որդեգրված անձի կենսաբանական ծնողի կողմից:

24. Ձև 2 տեղեկանքը համապատասխան ծնողի մասով ապանձնավորված եղանակով տրամադրելիս չեն լրացվում տեղեկանքի՝ կենսաբանական ծնողների մասին տեղեկությունների բաժինների «բ», «գ», «թա», «թբ», «թգ» ենթակետերը, իսկ 4-րդ և 5-րդ կետերը լրացվում են՝ բացառելով ծնողի նույնականացումը ենթադրող անձնական տվյալների գրառումը՝ հաշվի առնելով սույն կարգի 23-րդ կետի պահանջները: Սույն կետում նշված դեպքում Տեղեկանքի «Տեղեկանքը տրամադրող մարմնի նշումներ» տողում կատարվում է գրառում համապատասխան ծնողի վերաբերյալ տեղեկություններն ամբողջությամբ լրացված չլինելու պատճառի մասին:

25. Այն դեպքում, երբ որդեգրման արդյունքում փոխվել է որդեգրված անձի ազգանունը, որը եղել է այն ծնողի ազգանունը, որը հրաժարվել է իր ազգանվան վերաբերյալ տեղեկությունները հայտնել որդեգրված անձին, կամ բացակայում է նման համաձայնություն, ապա Տեղեկանքների «Մինչև որդեգրումը քաղաքացու տվյալները» բաժնում ազգանվան վերաբերյալ տեղեկությունները չեն լրացվում: Այն դեպքում, երբ որդեգրման արդյունքում փոխվել է որդեգրված անձի հայրանունը, որի հայրը հրաժարվել է իր

անվան վերաբերյալ տեղեկությունները հայտնել որդեգրված անձին կամ բացակայում է նման համաձայնություն, ապա Տեղեկանքների «Մինչև որդեգրումը քաղաքացու տվյալները» բաժնում հայրանվան վերաբերյալ տեղեկությունները չեն լրացվում:

#### IV. ՏԵՂԵԿԱՆՔ ՍՏԱՆԱԼՈՒ ԴԻՄՈՒՄԸ

26. Տեղեկանքներ ստանալու դիմում ներկայացնելու համար տեղեկություն հայցողը կամ նրա կողմից լիազորված անձը անձամբ ներկայանում է սույն կարգի 8-րդ կետում նշված մարմիններից մեկը: Էլեկտրոնային կամ փոստային ծառայությունների միջոցով ներկայացված դիմումների հիման վրա Տեղեկանքներ կամ այլ տեղեկություններ չեն տրամադրվում, բացառությամբ սույն կարգի 29-րդ կետում նշված դեպքերի:

27. Այն դեպքում, երբ դիմումը ներկայացվել է Հայաստանի Հանրապետության բնակչության սոցիալական պաշտպանության հաստատություն կամ Կենտրոնական մարմին, որտեղ չի պահպանվում որդեգրված անձի անձնական գործը, ապա դիմում ընդունող մարմինը երեք աշխատանքային օրվա ընթացքում սույն կարգի 15-րդ կետով նախատեսված գործողություններն իրականացնելուց, ներկայացված փաստաթղթերի ամբողջականությունը ստուգելուց հետո, դիմումը և կից փաստաթղթերը վերահասցեագրում է Լիազորված պետական մարմին, որը Տեղեկանքներ պատրաստելու համար սույն կարգով նախատեսված ժամկետների ընթացքում անհրաժեշտ գործողություններ իրականացնելուց հետո կազմում է հայցվող տեղեկանքը և ուղարկում դիմում ընդունած մարմին՝ դիմողին հանձնելու նպատակով:

28. Տեղեկանքներ ստանալու դիմումի օրինակելի ձևը հաստատված է սույն կարգի ձև 3-ով: Դիմումը պետք է պարունակի հնարավոր տեղեկություններ որդեգրված անձի, նրա կենսաբանական ծնողների և որդեգրողների վերաբերյալ:

29. Կենտրոնական մարմնի միջոցով Կոնվենցիայի շրջանակներում որդեգրված անձի վերաբերյալ Տեղեկանքները ստանալու համար դիմումը կարող է ներկայացվել Օտարերկրյա պետության կենտրոնական մարմնի միջնորդությամբ՝ էլեկտրոնային կամ փոստային ծառայության միջոցով՝ կցելով սույն կարգի 31-րդ կետով սահմանված փաստաթղթերի պատճենները: Սույն կետում նշված դեպքում դիմումը և կից փաստաթղթերը կարող են ներկայացվել հայերեն կամ ռուսերեն կամ անգլերեն լեզուներով:

30. Սույն կարգի 29-րդ կետով սահմանված կարգով ստացված դիմումների հիման վրա Օտարերկրյա պետության կենտրոնական մարմին տրամադրվում է տեղեկանքի լուսապատճենահանված տարբերակը հարցումը կատարած մարմնի էլեկտրոնային հասցեին: Տեղեկանքներ հայցողի ցանկության դեպքում Կենտրոնական մարմինը կարող է ուղարկել նաև տեղեկանքի ռուսերեն կամ անգլերեն ոչ պաշտոնական թարգմանության լուսապատճենահանված տարբերակը: Տեղեկանքների բնօրինակները ստանալու ցանկության դեպքում վերջիններն ուղարկվում են փոստային ծառայության՝ Կենտրոնական մարմնի կողմից նամակագրության համար կիրառվող տարբերակով:

31. Տեղեկանքներ ստանալու համար, դիմումի հետ միաժամանակ, Տեղեկանքներ տրամադրող մարմին է ներկայացվում դիմողի անձը հաստատող փաստաթուղթը: Լիազորված անձի կողմից դիմում ներկայացվելու դեպքում Տեղեկանքներ տրամադրող մարմին է ներկայացվում լիազորագիր, լիազորված անձի անձը հաստատող փաստաթուղթ, լիազորողի անձը հաստատող փաստաթղթի պատճեն:

32. Դիմումին կից ներկայացվող օտարերկրյա պետության իրավասու մարմնի կողմից տրված փաստաթղթերը (անձնագիր, լիազորագիր և այլն) ենթակա են թարգմանության հայերեն լեզվով՝ Հայաստանի Հանրապետության օրենսդրությամբ սահմանված կարգով, բացառությամբ սույն կարգի 29-րդ կետով սահմանված կարգով ներկայացված դիմումների:



33. Դիմում ընդունող մարմինը դիմումին կցում է սույն կարգի 31-րդ կետով նախատեսված փաստաթղթերի պատճենները՝ բնօրինակները վերադարձնելով հայցողին:

34. Սույն կարգի 8-րդ կետում նշված մարմիններից բացի, Տեղեկանքներ ստանալու դիմում կարող է ներկայացվել քաղաքացիական կացության ակտերի գրանցման մարմիններին՝ դիմում ներկայացնելու համար սույն կարգի պահանջներին համապատասխան՝ անկախ դիմողի բնակության վայրից: Դիմում ընդունած քաղաքացիական կացության ակտերի գրանցման մարմինը երեք աշխատանքային օրվա ընթացքում, հայցողի կողմից տրամադրված տեղեկությունների լիարժեքությունը ապահովելու նպատակով սույն կարգի 15-րդ կետով նախատեսված գործողություններ իրականացնելուց, ներկայացված փաստաթղթերի ամբողջականությունը ստուգելուց հետո, դիմումը և կից փաստաթղթերը վերահասցեագրում է Լիազորված պետական մարմին, որը Տեղեկանքներ պատրաստելու համար սույն կարգով նախատեսված ժամկետների ընթացքում անհրաժեշտ գործողություններ իրականացնելուց հետո կազմում է հայցվող տեղեկանքը և ուղարկում դիմում ընդունած մարմին՝ դիմողին հանձնելու նպատակով:

## V. ԴԻՄՈՒՄԻ ՔՆՆԱՐԿՈՒՄԸ

35. Դիմում ստացած մարմինը միջոցներ է ձեռնարկում որդեգրված անձի անձնական գործը հայտնաբերելու ուղղությամբ: Անհրաժեշտության դեպքում կապ է հաստատում Տեղեկանքներ հայցողի կամ սույն կարգով նախատեսված այլ իրավասու մարմինների հետ:

36. Ձև 2 տեղեկանք տրամադրելիս, դիմում ստացած մարմինը, որդեգրված անձի անձնական գործի փաստաթղթերի ուսումնասիրության արդյունքում, առաջնահերթ պարզում է որդեգրված անձի կենսաբանական ծնողի՝ իր տվյալները երեխային տրամադրելու համաձայնության առկայությունը, տրամադրվող տեղեկությունների թույլատրելի սահման-

ները, ըստ որի ընտրում է տրամադրվող Տեղեկանքների լրացման անձնավորված կամ ապանձնավորված եղանակը և տեղեկությունների լրացման սահմանը:

37. Եթե դիմումի քննարկման ընթացքում պարզվում է, որ դիմում ներկայացնողը չի հանդիսանում սույն կարգի 3-րդ, 4-րդ կետերով նշված անձանցից որևէ մեկը, ապա տեղեկանքի տրամադրումը մերժվում է:

38. Այն դեպքում, երբ Լիազորված պետական մարմինը չի հայտնաբերում որդեգրված անձի անձնական գործը կամ դրան առնչվող որևէ փաստաթուղթ, որն անհրաժեշտ է Տեղեկանքները կազմելու (լրացնելու) համար, ապա նրա կողմից սույն կարգի 15-րդ կետում նշված ժամկետում, հարցում է կատարվում Հայաստանի Հանրապետության բնակչության սոցիալական պաշտպանության այն հաստատություն, որտեղ գտնվում է երեխայի անձնական գործը՝ անհրաժեշտ փաստաթղթերը ստանալու նպատակով:

39. Կենտրոնական մարմնի կողմից Տեղեկանքներ կազմելու համար անհրաժեշտ տեղեկությունների բացակայության դեպքում վերջինիս կողմից, սույն կարգի 15-րդ կետում նշված ժամկետում, հարցում է կատարվում Լիազորված պետական մարմին կամ որդեգրված երեխայի անձնական գործի պահպանության Հայաստանի Հանրապետության բնակչության սոցիալական պաշտպանության հաստատություն:

40. Սույն կարգի 38-րդ, 39-րդ կետերում նշված հարցումների պատասխանները հայցվող մարմինների կողմից տրամադրվում են երեք աշխատանքային օրվա ընթացքում: Սույն կարգով նախատեսված իրավասու մարմինները կարող են հարցումներ կատարել և դրանց պատասխանները ստանալ նաև էլեկտրոնային փոստի միջոցով:

41. Եթե դիմումը ներկայացվել է Կենտրոնական մարմին, որի միջոցով չի կազմակերպվել որդեգրման գործընթացը, կամ Հայաստանի Հանրապետության բնակչության սոցիալական պաշտպանության այն հաստատություն, որտեղ չի բնակվել որդեգրված անձը, կամ չի պահպանվում նրա անձնական գործը, ապա վերջիններիս կողմից երեք աշխա-

տանքային օրվա ընթացքում դիմումը վերահասցեագրվում է Լիազորված պետական մարմին՝ սույն կարգով սահմանված պահանջներին համապատասխան Տեղեկանքները տրամադրելու նպատակով՝ այդ մասին գրավոր (սամակով կամ էլեկտրոնային փոստի միջոցով) տեղեկացնելով դիմողին: Նշված դեպքում Տեղեկանքներ ստանալու համար դիմողը ներկայանում է Լիազորված պետական մարմին:

## VI. ԿԵՆՍԱՐԱՆԱԿԱՆ ԾՆՈՂԻ ՀԱՄԱՁԱՅՆՈՒԹՅՈՒՆԸ

42. Երեխայի կենսաբանական ծնողի համաձայնությունը կամ հրաժարվելը՝ երեխային որդեգրելուց հետո իր անձնական տվյալները վերջինիս հայտնելու մասին ձևակերպվում է ծնողի՝ երեխայի նկատմամբ ծնողական իրավունքներից հրաժարվելու մասին դիմումում, երեխային որդեգրման տալու համաձայնության մեջ կամ առանձին փաստաթղթով: Ծնողի կողմից կարող է համաձայնություն տրվել սույն կարգի 7-րդ կետում նշված իր անձնական տվյալները որդեգրված երեխային մասնակի տրամադրելու մասին՝ հստակ նշելով այն տվյալները, որոնք վերջինս չի ցանկանում հայտնել որդեգրված անձին:

43. Երեխայի կենսաբանական ծնողը ցանկացած ժամանակ կարող է դիմել Լիազորված պետական մարմնին կամ երեխայի՝ ծնողին հայտնի բնակության վայրի Հայաստանի Հանրապետության բնակչության սոցիալական պաշտպանության հաստատություն՝ ներկայացնելով երեխային որդեգրելուց հետո վերջինիս իր անձնական տվյալների վերաբերյալ տեղեկությունները հայտնելու համաձայնությունը կամ նման տեղեկություններ չտրամադրելու մասին հայտարարությունը, ինչպես նաև փոփոխել նախկինում տրված հայտարարության (համաձայնության) բովանդակությունը:

44. Երեխայի կենսաբանական ծնողի կողմից տրված հայտարարությունը (համաձայնությունը) կցվում է երեխայի անձնական գործին:

45. Այն դեպքում, երբ երեխայի կենսաբանական ծնողի կողմից հայտարարությունը (համաձայնությունը) ներկայացվում է երեխայի՝ ծնողին հայտնի բնակության վայրի Հայաստանի Հանրապետության բնակչության սոցիալական պաշտպանության հաստատություն, որտեղ չի պահպանվում երեխայի անձնական գործը երեխայի տեղափոխման հետևանքով, ապա այդ հայտարարությունը (համաձայնությունը) տվյալ հաստատության կողմից երեք աշխատանքային օրվա ընթացքում ուղարկվում է Լիազորված պետական մարմին:

46. Երեխայի կենսաբանական ծնողը հայտարարություն կամ համաձայնություն ներկայացնելու համար կարող է նաև իր ընտրությամբ դիմել Հայաստանի Հանրապետության բնակչության սոցիալական պաշտպանության ցանկացած հաստատություն: Սույն կետում նշված դեպքում հայտարարություն (համաձայնություն) ստացած հաստատությունը երեք աշխատանքային օրվա ընթացքում այն ուղարկում է Լիազորված պետական մարմին:

47. Լիազորված պետական մարմինը սույն կարգի 43-րդ, 45-րդ, 46-րդ կետերով նախատեսված դեպքերում երեխայի կենսաբանական ծնողի հայտարարությունը (համաձայնությունը) ստանալուց երեք աշխատանքային օրվա ընթացքում դրա պատճենը կցում է իր մոտ պահպանվող երեխայի փաստաթղթերին, իսկ բնօրինակն ուղարկում է երեխայի անձնական գործը պահպանող Հայաստանի Հանրապետության բնակչության սոցիալական պաշտպանության հաստատություն: Սույն կետով նշված հայտարարության (համաձայնության) պատճենը երեք աշխատանքային օրվա ընթացքում Լիազորված պետական մարմնի կողմից ուղարկվում է նաև Կենտրոնական մարմին, այն դեպքում, երբ երեխան որդեգրվել է Կենտրոնական մարմնի միջոցով:

ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ  
ՎԱՐՉԱՊԵՏ

Ն. ՓԱՇԻՆՅԱՆ

**ՏԵՂԵԿԱՆՔ**  
**18 տարին լրացած որդեգրված անձի՝ իր որդեգրման փաստի մասին**

Հաստատվում է, որ քաղաքացի \_\_\_\_\_-ի  
(անուն, հայրանուն, ազգանուն)

նկատմամբ իրականացվել է որդեգրման գործընթաց: Քաղաքացին, որպես որդեգրման ենթակա երեխա, կենտրոնական հաշվառման է վերցվել \_\_\_\_\_ թվականին: Որպես որդեգրման ենթակա երեխա հաշվառվելու համար հիմք է հանդիսացել \_\_\_\_\_:

(ծնողի համաձայնությունը, ծնողի՝ ծնողական իրավունքներից հրաժարվելու դիմումը և այլն)

Մինչև որդեգրումը քաղաքացու տվյալները՝

Անուն, ազգանուն, հայրանուն \_\_\_\_\_

Ծննդյան ժամանակ \_\_\_\_\_

Ծննդավայր \_\_\_\_\_

Մինչև որդեգրումը որդեգրված անձի պատմությունը՝

ա) սոցիալական \_\_\_\_\_

բ) հոգեբանական \_\_\_\_\_

գ) բժշկական (հիվանդություններ, պատվաստումներ և այլն) \_\_\_\_\_

\_\_\_\_\_

Տեղեկանքը տրամադրող մարմնի նշումներ \_\_\_\_\_

\_\_\_\_\_ (տեղեկանք տրամադրող անձի պաշտոնի անվանում)

\_\_\_\_\_ (անուն, ազգանուն)

\_\_\_\_\_ (ստորագրություն)

« \_\_\_\_ » \_\_\_\_\_ թ.

**ՏԵՂԵԿԱՆՔ**

**18 տարին լրացած որդեգրված անձի՝ իր որդեգրման փաստի, կենսաբանական ծնողների անձնական տվյալների մասին**

**1. Որդեգրված անձի որդեգրման փաստի մասին տեղեկություններ**

Հաստատվում է, որ քաղաքացի \_\_\_\_\_-ի  
(անուն, հայրանուն, ազգանուն)

նկատմամբ իրականացվել է որդեգրման գործընթաց: Քաղաքացին, որպես որդեգրման ենթակա երեխա, կենտրոնական հաշվառման է վերցվել \_\_\_\_\_ թվականին: Որպես որդեգրման ենթակա երեխա հաշվառվելու համար հիմք է հանդիսացել \_\_\_\_\_:

(ծնողի համաձայնությունը, ծնողի՝ ծնողական իրավունքներից հրաժարվելու դիմումը և այլն)

Մինչև որդեգրումը քաղաքացու տվյալները՝

Անուն, ազգանուն, հայրանուն \_\_\_\_\_

Ծննդյան ժամանակ \_\_\_\_\_

Ծննդավայր \_\_\_\_\_

Մինչև որդեգրումը որդեգրված անձի պատմությունը՝

ա) սոցիալական \_\_\_\_\_

բ) հոգեբանական \_\_\_\_\_

գ) բժշկական (հիվանդություններ, պատվաստումներ և այլն) \_\_\_\_\_

\_\_\_\_\_

\_\_\_\_\_

**2. Կենսաբանական մոր մասին տեղեկություններ**

ա) քաղաքացիություն \_\_\_\_\_

բ) անուն, հայրանուն, ազգանուն \_\_\_\_\_

գ) ծննդյան ժամանակ, ծննդյան վայր \_\_\_\_\_

դ) ազգություն \_\_\_\_\_

ե) դավանանք \_\_\_\_\_

զ) կրթություն \_\_\_\_\_

է) մասնագիտություն \_\_\_\_\_

ը) արյան կարգ \_\_\_\_\_

թ) ծնողական իրավունքներից հրաժարվելու կամ երեխային որդեգրման տալու պահի դրությամբ՝

թա) աշխատանքի վայր \_\_\_\_\_

թբ) հաշվառման հասցե \_\_\_\_\_

թգ) փաստացի բնակության վայր \_\_\_\_\_

\_\_\_\_\_

թդ) ընտանեկան կարգավիճակ \_\_\_\_\_  
(ամուրի, ամուսնացած, ամուսնալուծված, այրի)

թե) երեխան հանդիսանում է կնոջ \_\_\_\_\_ երեխան

(թվով որերորդ երեխան է)

թզ) առողջական խնդիրներ, հիվանդություններ \_\_\_\_\_

\_\_\_\_\_

\_\_\_\_\_

**3. Կենսաբանական հոր վերաբերյալ տեղեկություններ**

ա) քաղաքացիություն \_\_\_\_\_

բ) անուն, հայրանուն, ազգանուն \_\_\_\_\_

գ) ծննդյան ժամանակ, ծննդյան վայր \_\_\_\_\_

դ) ազգություն \_\_\_\_\_

ե) դավանանք \_\_\_\_\_

- զ) կրթություն \_\_\_\_\_
- է) մասնագիտություն \_\_\_\_\_
- ը) արյան կարգ \_\_\_\_\_

թ) ծնողական իրավունքներից հրաժարվելու կամ երեխային որդեգրման տալու պահի դրությամբ՝  
 թա) աշխատանքի վայր \_\_\_\_\_  
 թբ) հաշվառման հասցե \_\_\_\_\_  
 թգ) փաստացի բնակության վայր \_\_\_\_\_

\_\_\_\_\_ (ամուրի, ամուսնացած, ամուսնալուծված, այրի)  
 թդ) ընտանեկան կարգավիճակ \_\_\_\_\_  
 թե) երեխան հանդիսանում է տղամարդու \_\_\_\_\_ երեխան  
 (թվով որերորդ երեխան է)  
 թզ) առողջական խնդիրներ, հիվանդություններ \_\_\_\_\_

4. Ծնողի (ծնողների) կողմից ծնողական իրավունքներից հրաժարվելու դիմումի կամ երեխային որդեգրման տալու համաձայնության պատճառը

\_\_\_\_\_

5. Երեխայի գործում առկա երեխայի և նրա կենսաբանական ծնողների վերաբերյալ այլ տեղեկություններ

\_\_\_\_\_

Տեղեկանքը տրամադրող մարմնի նշումներ \_\_\_\_\_

\_\_\_\_\_ (տեղեկանք տրամադրող անձի պաշտոնի անվանում)

\_\_\_\_\_ (անուն, ազգանուն)

\_\_\_\_\_ (ստորագրություն)

« \_\_\_\_\_ » \_\_\_\_\_ թ.

**Օրինակելի Ձև 3**

\_\_\_\_\_ (նշել այն մարմնի անվանումը, ում ներկայացվում է դիմումը)

Քաղ. \_\_\_\_\_ (անունը, հայրանունը, ազգանունը)

\_\_\_\_\_ - ից

Հասցե՝ \_\_\_\_\_

\_\_\_\_\_ (անձը հաստատող փաստաթղթի անվանումը, համարը,

\_\_\_\_\_ երբ և ում կողմից է տրվել)

Հեռախոս \_\_\_\_\_

Էլ. հասցե \_\_\_\_\_

**Գ Ի Մ ՈՒ Մ**

**Որդեգրման փաստի կամ կենսաբանական ծնողների վերաբերյալ տեղեկություններ ստանալու մասին**

Խնդրում եմ ինձ տրամադրել

- որդեգրման փաստի մասին տեղեկություններ
- կենսաբանական հոր մասին տեղեկություններ
- կենսաբանական մոր մասին տեղեկություններ

(վանդակներում նշվում են հայցվող տեղեկությունները)

Ձեռն ցանկանում, որպեսզի տեղեկանքում նշվեն \_\_\_\_\_

\_\_\_\_\_ մասին տվյալները:

(վերը նշված տողը լրացվում է այն դեպքում, երբ հայցողը չի ցանկանում ամբողջական տվյալներ ստանալ որդեգրման փաստի, կենսաբանական ծնողների մասին: Հայցողը հստակ թվարկում է այն տեղեկությունները, որոնց մասին նա չի ցանկանում տեղեկացվել)

Հայտնում եմ հետևյալ տեղեկությունները՝

1) Որդեգրված երեխայի մասին.

Անուն, հայրանուն, ազգանուն մինչև որդեգրումը \_\_\_\_\_

Անուն, հայրանուն, ազգանուն որդեգրումից հետո \_\_\_\_\_

Ծննդյան ժամանակ, ծննդյան վայր \_\_\_\_\_

Որդեգրման ժամանակ \_\_\_\_\_ (դատարանի վճռի կամ որդեգրման ակտի գրանցման և այլն)

Բնակության վայրը մինչև որդեգրումը \_\_\_\_\_



2) Որդեգրող մոր անուն, հայրանուն, ազգանուն \_\_\_\_\_

Քաղաքացիություն \_\_\_\_\_

Ծննդյան ժամանակ \_\_\_\_\_

3) Որդեգրող հոր անուն, հայրանուն, ազգանուն \_\_\_\_\_

Քաղաքացիություն \_\_\_\_\_

Ծննդյան ժամանակ \_\_\_\_\_

Որդեգրված անձի և որդեգրողների վերաբերյալ այլ տեղեկություններ \_\_\_\_\_

\_\_\_\_\_  
\_\_\_\_\_  
\_\_\_\_\_

Կից ներկայացվում է.

\_\_\_\_\_  
\_\_\_\_\_  
\_\_\_\_\_

«\_\_» \_\_\_\_\_թ.

\_\_\_\_\_  
(ստորագրություն)